

**ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆԻ ԳԻՏԱԿԱՆ ԽՈՐՀՐԴԻ
ՈՐՈՇՈՒՄ N 7/9**

26 մայիսի, 2016թ.

**ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆԻ ՖԻԶԻԿԱՅԻ ՖԱԿՈՒԼՏԵՏԻ
ՖԻԶԻԿԱՅԻ ԳԻՏԱՀԵՏԱԶՈՏԱԿԱՆ ԻՆՍՏԻՏՈՒՏԻ ԿԱՆՈՆԱԴՐՈՒԹՅՈՒՆԸ
ՀԱՍՏԱՏԵԼՈՒ ՄԱՍԻՆ**

Ղեկավարվելով Երևանի պետական համալսարանի կանոնադրության 49-րդ կետի 4-րդ ենթակետով և Երևանի պետական համալսարանի գիտական խորհրդի կանոնակարգի 4-րդ կետի 4-րդ ենթակետով՝ Երևանի պետական համալսարանի գիտական խորհուրդը որոշում է.

1. Հաստատել Երևանի պետական համալսարանի ֆիզիկայի ֆակուլտետի ֆիզիկայի գիտահետազոտական ինստիտուտի կանոնադրությունը՝ համաձայն հավելվածի:
2. Սույն որոշումն ուժի մեջ է մտնում ընդունման պահից:

ԵՊՀ ԳԻՏԱԿԱՆ ԽՈՐՀՐԴԻ ՆԱԽԱԳԱՀ՝

Ա. Հ. ՍԻՄՈՆՅԱՆ

Հաստատված է
ԵՊՀ գիտական խորհրդի
2016 թ. մայիսի 26-ի նիստում
ԵՊՀ գիտական խորհրդի նախագահ
Ա. Հ. Մինոնյան
«26» մայիսի, 2016թ.

ԿԱՆՈՆԱԴՐՈՒԹՅՈՒՆ
ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆԻ ՖԻԶԻԿԱՅԻ ՖԱԿՈՒԼՏԵՏԻ ՖԻԶԻԿԱՅԻ
ԳԻՏԱՀԵՏԱԶՈՏԱԿԱՆ ԻՆՍՏԻՏՈՒՏԻ

I. ԸՆԴՀԱՆՈՒՐ ԴՐՈՒՅԹՆԵՐ

1. Երևանի պետական համալսարանի (այսուհետ՝ ԵՊՀ) ֆիզիկայի ֆակուլտետի (այսուհետ՝ ֆակուլտետ) ֆիզիկայի գիտահետազոտական ինստիտուտը (այսուհետ՝ ինստիտուտ) ԵՊՀ-ի ֆիզիկայի ֆակուլտետի կազմում գործող կառուցվածքային ստորաբաժանում է:

2. Ինստիտուտը գործում է Հայաստանի Հանրապետության օրենսդրությանը համապատասխան, ԵՊՀ-ի կանոնադրության, ֆակուլտետի կանոնադրության և սույն կանոնադրության հիման վրա:

3. Ինստիտուտի կանոնադրությունը, դրանում կատարվող փոփոխությունները և լրացումները հաստատվում են ԵՊՀ գիտական խորհրդում:

4. Ինստիտուտը ստեղծվում, վերակազմակերպվում կամ լուծարվում է ԵՊՀ-ի հոգաբարձուների խորհրդի որոշմամբ:

5. Ինստիտուտի պաշտոնական անվանումն է՝
հայերեն՝ ԵՊՀ ֆիզիկայի ֆակուլտետի ֆիզիկայի գիտահետազոտական ինստիտուտ (ՖԳՀԻ)

ռուսերեն՝ Научно-исследовательский институт физики (НИИФ) факультета физики ЕГУ
անգլերեն՝ Scientific-research Institute of Physics (SRIP) of the Faculty of Physics of YSU

6. Ինստիտուտի գտնվելու վայրն է՝ ՀՀ, ք. Երևան, Ալեք Մանուկյան 1:

7. Ինստիտուտը սահմանված կարգով կարող է ունենալ իր անվանմամբ դրոշմակնիք՝ հայերեն, ռուսերեն, անգլերեն լեզուներով և պաշտոնաթուղթ:

II. ԻՆՍՏԻՏՈՒՏԻ ԽՆԴԻՐՆԵՐՆ ՈՒ ԻՐԱՎԱՍՈՒԹՅՈՒՆԸ

9. Ինստիտուտն իր իրավասության շրջանակում իրականացնում է գիտահետազոտական գործունեություն հետևյալ ուղղություններով.

- Ատոմներում քվանտային միկրոպրոցեսորների ղեկավարում, ատոմական օպտիկա, քվանտային ցրումներ քվազիմիաչափ կառուցվածքներում, քվանտային մակրոերևույթներ աստղաֆիզիկայում, կիսահաղորդչային նանոչափ կառուցվածքների ստացման և հետազոտման տեխնոլոգիաներ:

- Հեղուկ բյուրեղային (ՀԲ) ֆոտոնային կառուցվածքների, մանրանրբին օպտոէլեկտրոնային տարրերի և լազերային ճառագայթման աղբյուրների ստեղծում: Լազերով մակաձված նոր հիդրոդինամիկական երևույթների ուսումնասիրում ՀԲ-ներում:

- Ռենտգենյան հետազոտություններ, պինդ մարմնային նանոհամակարգերի տեսական հետազոտություններ, ցածր ջերմաստիճանային (այդ թվում գերհաղորդականության) և մագնիսական հետազոտություններ, գիտական սարքաշինություն, նյութաբանություն:

- Աստղաֆիզիկական նոր օբյեկտների հայտնաբերում, սպեկտրային, գունաչափական, ձևաբանական, կինեմատիկական և վիճակագրական հետազոտություններ

- Գրավիտացիայի տեսություններ և դրանց աստղաֆիզիկական ու կոսմոլոգիական կիրառություններ, վակուումային քվանտային երևույթներ արտաքին դաշտերում, էլեկտրամագնիսական պրոցեսներ բյուրեղային միջավայրերում, ինտեգրվող համակարգեր:

- Թաղանթների ձևագոյացման ուսումնասիրում:

- ԴՆԹ-լիզանդ կոմպլեքսների կառուցվածքի, G-քվադրուպլեքսների առաջացման լիպիդային թաղանթների հատկությունների և սինթետիկ պոլիմերների կառուցվածքի ուսումնասիրություններ, կենսապոլիմերներում կոնֆորմացիոն անցումների մոդելավորում:

- Սոլիտոնային և սիմիլարիտոնային երևույթների հետազոտություններ, ոչ գծային օպտիկական Ֆուրյե-փոխակերպման տիպի երևույթների ուսումնասիրություններ ֆեմտոպարկյանային ժամանակային տիրույթում:

- Գծային և ոչ գծային մոտարկումներ և դրանց կիրառություններ:

10. Ինստիտուտն իր իրավասության սահմաններում իրավունք ունի ընդունելու որոշումներ, եթե դրանք չեն հակասում Հայաստանի Հանրապետության օրենսդրությանը, ԵՊՀ կանոնադրությանը, ֆակուլտետի կանոնադրությանը, ԵՊՀ ներքին իրավական ակտերին և Ինստիտուտի կանոնադրությանը:

11. Ինստիտուտի ֆինանսական միջոցների գոյացման աղբյուրներ կարող են լինել Հայաստանի Հանրապետության պետական բյուջեից կատարվող հատկացումները, Հայաստանի Հանրապետության ու օտարերկրյա պետությունների իրավաբանական և ֆիզիկական անձանց կատարած բարեգործական հատկացումները, նվիրատվությունները, Հայաստանի Հանրապետության օրենսդրությամբ չարգելված այլ աղբյուրները: ԵՊՀ եկամուտների և ծախսերի տարեկան նախահաշվով ԵՊՀ-ի հոգաբարձուների խորհրդի որոշմամբ Ինստիտուտին կարող են հատկացվել ֆինանսական միջոցներ, որոնք Ինստիտուտը տնօրինում է սահմանված կարգով:

III. ԻՆՍՏԻՏՈՒՏԻ ԿԱՌԱՎԱՐՈՒՄԸ

13. Ինստիտուտի կառավարումն իրականացվում է ՀՀ օրենսդրության, ԵՊՀ կանոնադրությանը, ֆակուլտետի կանոնադրությանը և Ինստիտուտի կանոնադրությանը համապատասխան, միանձնյա և կոլեգիալ կառավարման սկզբունքների գույակցմամբ:

14. Ինստիտուտի կառավարման մարմիններն են Ինստիտուտի գիտական խորհուրդը և տնօրենը, որոնք իրենց իրավասության սահմաններում ընդունում են ինքնուրույն որոշումներ, եթե դրանք չեն հակասում Հայաստանի Հանրապետության օրենսդրությանը, ԵՊՀ կանոնադրությանը, ֆակուլտետի կանոնադրությանը, ԵՊՀ ներքին իրավական ակտերին և սույն կանոնադրությանը:

15. Ինստիտուտի գիտական խորհուրդն իր իրավասության շրջանակում քննարկում և լուծում է Ինստիտուտի գործունեությանն առնչվող հիմնական հարցերը:

16. Գիտական խորհուրդը կազմված է ի պաշտոնե, հրավիրյալ և ընտրովի անդամներից: Գիտական խորհրդի անդամների թիվը չի կարող գերազանցել 34-ը: Գիտական խորհրդի ի պաշտոնե և հրավիրյալ անդամների թիվը չի կարող գերազանցել գիտական խորհրդի կազմի 50 տոկոսը:

17. Գիտական խորհրդի կազմի մեջ ի պաշտոնե մտնում են տնօրենը՝ որպես նախագահ, տնօրենի տեղակալը, արհբյուրոյի նախագահը, Ինստիտուտի լաբորատորիաների ղեկավարները:

18. Գիտական խորհրդի կազմում կարող են ընդգրկվել Ինստիտուտի գործունեության և մասնագիտությունների հետ կապված արտահամալսարանական ու արտաինստիտուտային մասնագետներ՝ գիտական խորհրդի կազմի մինչև 15 տոկոսի չափով:

19. Գիտական խորհրդի ընտրովի անդամների թեկնածությունները համամասնորեն առաջադրում են Ինստիտուտի կառուցվածքային ստորաբաժանումները, որոնց թիվը հաշվարկվում է ըստ տվյալ ստորաբաժանման հաստիքների գումարային թվաքանակի: Գիտական խորհրդի ընտրովի անդամներ կարող են առաջադրվել բացառապես տվյալ ստորաբաժանման հիմնական գիտական աշխատողները:

20. Գիտական խորհրդի լիազորությունների ժամկետը 5 տարի է: Գիտական խորհրդի լիազորությունների ավարտից մեկ ամիս առաջ տնօրենը ռեկտորի հաստատմանն է ներկայացնում գիտական խորհրդի անդամների ցուցակը:

21. Գիտական խորհրդի քարտուղարին գիտական խորհրդի անդամներից տնօրենի ներկայացմամբ նշանակում է ռեկտորը:

22. Ինստիտուտի գիտական խորհուրդը՝

ա) ընդունում է Ինստիտուտի զարգացման ծրագիրը,

բ) քննարկում է Ինստիտուտի լաբորատորիաների գիտահետազոտական աշխատանքների մասին հաշվետվությունները,

գ) իր կազմից ձևավորում է մշտական և/կամ ժամանակավոր հանձնաժողովներ,

դ) հաստատում է տնօրենի ներկայացրած՝ Ինստիտուտի գիտական խորհրդի մրցութային հանձնաժողովի կազմը, որը սահմանված կարգով իրականացնում է Ինստիտուտի գիտաշխատողների աշխատանքի ընդունման մրցութային գործընթացը,

ե) սահմանված կարգով իրականացնում է Ինստիտուտի գիտաշխատողների համակազմի ընտրությունը՝ հիմք ընդունելով մրցութային հանձնաժողովի որոշումը,

է) լսում է Ինստիտուտում կատարվող գիտական թեմաների վերաբերյալ հաշվետվություններ, դրամաշնորհների, գիտակրթական գործուղումների վերաբերյալ հաղորդումներ,

ը) լուծում է Ինստիտուտի գիտահետազոտական, գիտակրթական աշխատանքի, արտահամալսարանական և միջազգային գործունեության այլ հարցեր:

23. Ինստիտուտի գիտական խորհրդի նիստերը հրավիրում է տնօրենը՝ ըստ անհրաժեշտության, բայց ոչ պակաս, քան չորս անգամ մեկ ուսումնական տարում:

24. Գիտական խորհրդի նիստերն իրավագոր են նրա անդամների երկու երրորդի ներկայության դեպքում:

25. Ինստիտուտի գիտական խորհրդում որոշումներն ընդունվում են խորհրդի նիստին ներկա անդամների ձայների պարզ մեծամասնությամբ, բաց քվեարկությամբ, եթե գիտական խորհուրդն այլ որոշում չի կայացրել: Գիտական պաշտոնների տեղակալման, ընտրության մրցույթների քվեարկությունը կատարվում է փակ, գաղտնի ընթացակարգով:

26. Գիտական խորհրդի նախագահի՝ նիստի հրավիրման անհնարինության դեպքում գիտական խորհրդի նիստը հրավիրում և վարում է տնօրենի տեղակալը:

27. Գիտական խորհրդի նիստերին խորհրդակցական ձայնի իրավունքով կարող են մասնակցել համալսարանի ռեկտորը, պրոռեկտորը, ինչպես նաև հրավիրված այլ անձինք:

28. Գիտական խորհրդի որոշումները պարտադիր են Ինստիտուտի ստորաբաժանումների և աշխատողների համար:

29. Գիտական խորհրդի նիստերն արձանագրվում են: Արձանագրությունը ստորագրում են նախագահը և քարտուղարը: Նիստի օրակարգը և ընդունված որոշումները հինգ աշխատանքային օրվա ընթացքում ենթակա են հրապարակման ԵՊՀ-ի պաշտոնական կայքում:

30. Ինստիտուտի լաբորատորիաների վարիչների ընտրությունը կատարվում է Ինստիտուտի գիտական խորհրդի նիստում, փակ գաղտնի քվեարկությամբ:

31. Ինստիտուտի ընթացիկ գործունեությունը կազմակերպում և ղեկավարում է տնօրենը՝ իր իրավասության շրջանակում և Ինստիտուտի կանոնադրությանը համապատասխան: Տնօրենն ունի տեղակալ:

32. Ինստիտուտի տնօրենի թեկնածությունն առաջադրում է Ինստիտուտի գիտական խորհուրդը: Տնօրենն ընտրվում է ֆակուլտետի գիտական խորհրդում մրցութային կարգով

փակ գաղտնի քվեարկությամբ՝ ֆակուլտետի դեկանի ընտրության համար սահմանված ընթացակարգով:

33. Տնօրենին աշխատանքի է նշանակում և աշխատանքից ազատում է ԵՊՀ ռեկտորը՝ հիմք ընդունելով ֆակուլտետի գիտական խորհրդի որոշումը:

34. Տնօրենի պաշտոնում կարող է առաջադրվել գիտությունների դոկտորի կամ թեկնածուի գիտական աստիճան ունեցող անձը, ով Ինստիտուտում կամ ֆակուլտետում լաբորատորիայի վարիչի պաշտոն չի զբաղեցնում:

35. Ինստիտուտի տնօրենը՝

1) կազմակերպում և վերահսկում է Ինստիտուտի գիտական, գիտակրթական, միջազգային և այլ գործունեությունը,

2) ապահովում է Ինստիտուտի գիտական խորհրդի որոշումների կատարումը,

3) ԵՊՀ ռեկտորին առաջարկություն է ներկայացնում Ինստիտուտի հաստիքացուցակի վերաբերյալ,

4) ԵՊՀ ռեկտորին առաջարկություն է ներկայացնում Ինստիտուտի կառուցվածքում լաբորատորիաներ և այլ կառուցվածքային ստորաբաժանումներ ստեղծելու, վերակազմակերպելու և լուծարելու վերաբերյալ,

5) հաստատում է լաբորատորիաների գործունեության տարեկան ծրագրերը,

6) սահմանված կարգով տնօրինում է Ինստիտուտին հատկացված ֆինանսական միջոցները՝ այդ մասին հաղորդում ներկայացնելով ֆակուլտետի գիտական խորհրդին,

7) լուծում է Ինստիտուտի կանոնադրությունից բխող և Ինստիտուտի գիտահետազոտական գործունեության հետ կապված այլ հարցեր:

IV. ԻՆՍՏԻՏՈՒՏԻ ԿԱՌՈՒՑՎԱԾՔԸ

36. Ինստիտուտի հիմնական ստորաբաժանումներն են լաբորատորիաները:

37. Լաբորատորիաները Ինստիտուտի գիտական գործընթացի կազմակերպման հիմնական կառուցվածքային ստորաբաժանումներն են, որոնց ստեղծման և գործունեության կարգը, ինչպես նաև իրավասությունը սահմանվում է Ինստիտուտի կանոնադրությամբ:

38. Լաբորատորիաների կազմում ընդգրկված են գիտաշխատողները և լաբորանտները:

39. Լաբորատորիաները մշակում են իրենց գործունեության տարեկան ծրագիրը և ներկայացնում տնօրենի հաստատմանը:

40. Լաբորատորիաների գործունեության հիմնական հարցերը քննարկվում են լաբորատորիաների համակազմի նիստերում, որոնց նիստերին խորհրդակցական ձայնի իրավունքով կարող են մասնակցել Ինստիտուտի տնօրենը կամ տեղակալը:

41. Ինստիտուտի կանոնադրությանը կից հավելվածի տեսքով ներկայացվում են Ինստիտուտի բոլոր կառուցվածքային ստորաբաժանումները:

ՀԱՎԵԼՎԱԾ

ՖԳՀԻ կառուցվածքային ստորաբաժանումներն են՝

1. Քվանտային երևույթների հետազոտման և մոդելավորման գ/հ լաբորատորիա,

2. Մակրոմոլեկուլների ֆիզիկայի գ/հ լաբորատորիա,

3. Պինդ մարմնի ֆիզիկայի գ/հ լաբորատորիա,

4. Տեսական ֆիզիկայի գ/հ լաբորատորիա,

5. Օպտիկաէլեկտրոնիկայի և ֆոտոնիկայի գ/հ լաբորատորիա,

6. Գերարագ օպտիկայի և ֆոտոնիկայի գ/հ լաբորատորիա,

7. Գծային և ոչ գծային մոտարկման և դրանց կիրառման գ/հ լաբորատորիա,

8. Թաղանթների ձևավորման գ/հ լաբորատորիա,

9. Աստղաֆիզիկական հետազոտությունների գ/հ լաբորատորիա: